

Reakcija visokog predstavnika nakon neuspjelog imenovanja vlade u Kantonu 7

“Glasanjem protiv formiranja vlade u Kantonu 7, SDA i SBiH su okrenule leđa građanima koji su ih izabrali prije punih osam mjeseci” rekao je juče visoki predstavnik Paddy Ashdown nakon što je Skupština Kantona 7 propustila da izabere vladu. Visoki predstavnik je dodao da “građani Kantona 7 ne mogu više čekati. Prosvjetni i zdravstveni radnici obavljaju veoma važne poslove, ali za to ne primaju plate; političari primaju plate, ali ne obavljaju svoj posao; javne usluge od vitalnog značaja su ugrožene, kao i međunarodna reputacija Bosne i Hercegovine”. Visoki predstavnik je upozorio “Neodgovornost nekih političara u Kantonu 7 je sada dostigla nivo koji može utjecati na Studiju izvodljivosti Evropske unije o BiH, te usporiti proces integracije u evropske strukture.”

Gospodin Tihić i gospodin Halilović, kao lideri dvije stranke čiji su predstavnici glasali protiv dogovorenih kandidata za vladu, će morati objasniti zašto su njihove stranke u Kantonu 7 glasale protiv liste kandidata za vladu, koju su sami potpisali. Visoki predstavnik očekuje od njih da poduzmu odlučne mjere kako bi osigurali da njihove stranke u ovom Kantonu ispoštuju obavezu koju su preuzeli njihovi stranački lideri.

Visoki predstavnik ne može mirno stajati po strani i posmatrati kako se na ovakav način ugrožavaju interesi građana Kantona 7, kao i put Bosne i Hercegovine ka Evropi.

Zbog toga je visoki predstavnik donio sljedeće odluke:

- Da se finansijska sredstva za stranke koja SDA i SBiH dobivaju iz budžeta države, Federacije i Kantona 7, kao i budžeta općina u Kantonu 7, umanje za 10% počevši od

iduće godine – neopoziva kazna u iznosu od 66.000 KM za obje stranke.

- Da se umanje plate ministara u prijelaznoj vladi Kantona 7 na iznos prosječne plate u BiH, čime se odražava smanjeni obim posla ovih ministara, te ostvaruju uštede za budžet Kantona 7 i poreske obveznike.
- U 18:00 sati u ponedjeljak, 16. juna, ukoliko vlada još ne bude formirana, izvršiti sljedeće:
 - otpočeti sa umanjivanjem iznosa finansijskih sredstava za stranke za dodatnih 5 % za svaki radni dan dok se ne formira vlada;
 - poništiti imenovanje izabranog predsjedavajućeg, gospodina Omera Čevre, bez mogućnosti ponovnog imenovanja na tu funkciju, zbog neizvršavanja svoje ustavne dužnosti da pribavi konsenzus za formiranje vlade u Kantonu 7.
 - poduzeti mjere koje visoki predstavnik smatra odgovarajućim u skladu sa razvojem situacije u nekoliko narednih dana.
- Da se ispituju načini preraspodjele sredstava oduzetih od SDA i SBiH građanima koji su platili najvišu cijenu zbog neodgovornosti svojih političara. Visoki predstavnik će razmotriti načine za dodjelu 25% za prosvjetne radnike i obrazovanje, 25% za zdravstvene radnike i zdravstvenu zaštitu, 25% za penzionere i 25% za povratak izbjeglica.

Razlog zbog kojeg visoki predstavnik utvrđuje kaznu za SDA i SBiH iz budžeta za financiranje političkih stranaka za 2004. godinu jeste taj što se čini da su političke stranke već unaprijed iskoristile sva sredstva koja su im dodijeljena za cijelu 2003. godinu. Samo u Federaciji, to financiranje iznosi 1,5 milion KM, što predstavlja iznos bruto mjesečne plate za 2.500 nastavnika u osnovnim školama. Visoki predstavnik je juče rekao: "čini se da ovo samo po sebi jasno pokazuje šta su njihovi istinski prioriteti: to nisu ni građani, ni prosvjetni

radnici, ni penzioneri, već oni sami i njihovi stranački
sljedbenici.”